

## ■ OR DA LA VITA DA LUDMILLA CAHENZLI

# Eugen? Lain far in pop?

**I**n pac pampers custa 8.90 francs e cuntegna 38 sdratschs. I sa tracta da la sdratscha la pli bunmartgada ch'è da preschent sin fiera en Svizra. Ad in pop svizzer vegn probabel fatg sitg quatter giadas en di. Il pac sdratscha tanscha pia radund 10 dis. En in mais dovri per in normal pop svizzer trais tals pacs sdratscha. Quai custa circa 27 francs. Nun ch'il pop haja la fuira ed ins sto stgamiar pli savens.

**M**a sche geniturs d'in pop svizzer èn in pau temeligs e pensan che la sdratscha bunmartgada pudess scurtgar il tgilut dal pitschen descendent, cumpran els sdratscha da meglra qualitat: p. ex. in pac per 26 francs che cuntegna 70 sdratschs. Ils custs per la sdratscha muntan lura a radund 50 francs il mais.

**Q**uest'emna ha il cussegl dals chantuns decedì d'unifitgar ils supplements d'uffants en Svizra. Fin us era la chombra pitschna sa nuspida ed aveva refusà

l'unificaziun. Ma uss han ils cusseglers dals chantuns tuttina lubi ils supplements minimal da 200 francs.

**T**ge munta quai per nus, ils Cahenzlis? Duess jau, Ludmilla Cahenzli, forsa prender mes um Eugen per il maun e dir: «Vea Eugen, faschinsa in pop!» Il politichers vulan gea promover las famiglias cun questa decisiun. I duai dar dapli pops. «Kinder braucht das Land!» scriva ina gasetta en quel connex.

**M**a avant che carmalar mes um en chombra, ed avant d'interpreter «pass» irreversibels, fissi inditgà da far intginas calculaziuns.

**D**api il 2005 obtegnain nus, sco mintg'otra famiglia grischuna, 185 francs il mais per noss uffants. Prendì ch'il parlament federal na mida betg anc opiniun, e prendì ch'il supplement minimal va en vigur, e prendì che jau ed Eugen faschessan propi in pop,

obtegnissan nus per noss nov pop 15 francs dapli il mais. (En lettras: quindesch francs dapli il mais!)

**E**prendì che nus faschesan sitg noss pitschen novnaschè cun la sdratscha la pli bunmartgada ch'è sin fiera en Svizra: Ils 15 francs na tanschissan gnanca per finanziair il chajar e pischar dal nov pop-Cahenzli.

**S**ut talas circumstanzas èsi splitost difficil da dumagnar mes Eugen en chombra da durmir. L'iniziativa dal sindicat «Travail Suisse» che pretendia 450 francs supplements d'uffants al mais, fiss en quel regard bler pli stimulanta. Cun quella iniziativa pudess ins schizunt cumprar sdratscha che na scurtga betg il tgilut dal pop charin.

**M**a gist lezz'iniziativa levan ils cusseglers dals chantuns gea cumbatter cun lur «generusa» unificaziun svizra dals supplements d'uffants.

*Ludmilla Cahenzli*